

四庫全書

史部

欽定四庫全書

史部

平定兩金川方略卷一百三十三

四

給事中_臣查善長覆勘

總校官原任侍講_臣王燕緒

欽定四庫全書

平定兩金川方略卷一百五十三

二月乙卯

上諭內閣曰朕因金川以內地土司敢作不靖暴侮鄰

疆亦謂蠻觸相尋番人常性不值勞師涉遠屢經該

督提誠諭斂輯乃野性難馴反覆違約甚至狼狽為

奸負恩反噬非復可以舌化誨此而不懾以兵威

大示懲創則懦弱之士則幾無以自存且逆酋平日

有倉至維州橋之謠若聽其鴟張肆橫久之必至擾
及內地何以綏靖邊圉惟當掃滅叛蕃以圖一勞永
逸否則後患滋深此朕數年來不得已而用兵之苦
心也茲將軍阿桂統率將士不憚艱勞殫心謀畫我
八旗勁旅奮勇爭先漢土各兵有所效法亦皆踴躍
用命兩金川之地遂以次蕩平逆酋兄弟及黨惡之
大頭人等現皆擒獲俘獻露布馳聞大功全歲從此
即於其地設鎮駐兵番境寧謐各土司得以永慶安

全此皆仰賴

上蒼默佑

宗社鴻庥朕喜慰之餘倍深敬畏所有一切郊勞獻俘事宜及功成應行典禮著各衙門查例具奏並將武成原委宣示中外知之

同日

上又諭內閣曰金川全境蕩平逆酋兄弟及助惡頭人悉皆擒獲大功告成邊徼寧輯從此銘勲偃武實由

聖母福庇詒慶滋長歸

善顯揚尊崇宜備謹擬加上

皇太后徽號朕率王公大臣等共申慶

賀所有應行典禮著內閣博考彙章交各衙門敬謹承
辦具儀以聞

上又諭內閣曰年來征勦金川軍糧等項皆官為辦給
而負任運供不免稍資民力川省百姓踴躍急公甚
屬可嘉業已疊次加恩將乾隆四十年以前應征錢

糧特令該督等查明分數分別酌免茲金川全境蕩
平大功告歲用宜廣沛恩施以昭優恤著該督文綬
將川省節年應征緩帶錢糧查明承辦運務地方就
其出力輕重差務繁簡分別妥酌或全行蠲免或量
予蠲緩之處詳細核定計將軍阿桂此時尚未起身
並著會同查辦迅速奏聞

上又諭內閣曰此次進勦金川所需軍饟分路運供特
派劉秉恬鄂寶顏希深郝碩等董司其事並令富勒

渾在口外總理自督運以來辦理妥協用能轉運無
悞今大功告成宜加錄敘富勒渾劉秉恬俱著交部
議敘其辦運糧餉各站員及督辦之本省大員均屬
奮勉出力並著文綬富勒渾查明一併咨部議敘

同日

上諭軍機大臣曰土婦扎什納木前經設計投出情尚
可原竟可無庸解京伊子諾爾布湛都爾現在革布
什咱即可發回令其完聚再革布什咱土司納旺被

害之後並未另襲土司伊子諾爾布湛都爾是否可
以承襲著阿桂查明奏聞辦理至金川地方既已設
鎮安營止宜令兵丁屯種駐守如兵丁不敷於該處
降番內擇其妥當者在彼耕作仍遵前旨於出力土
兵內揀選妥人作為頭目管理方為妥協此一節交
文綬桂林辦理

丙辰

上諭內閣曰此次平定兩金川大功告成自應照從前

平定準噶爾回部之例於紫光閣圖畫功臣像掄其
功績最著者為前五十功臣朕親製贊並錄其較次
者為後五十功臣著大學士于敏中等擬贊紀實銘
勲用昭褒寵前此以大學士忠勇公傅恒居首此次
殫誠宣力百戰成功實惟將軍阿桂一人之力自應
列為首功其餘將佐候朕另行定次至隨朕辦理軍
務之軍機大臣五載以來始終其事者如大學士于
敏中承旨書諭倍著勤勞尚書公額駙福隆安夙夜

在公克宣勞績大學士舒赫德於此事雖未全行承辦而勦補臨清逆匪殊屬可嘉並著一體畫入前五十功臣像以示覈實酬庸之意

同日

上又諭內閣曰軍機大臣等日直辦事並著勤勞茲當大功告成宜加錄敘大學士于敏中業加恩賞給世職毋庸再議所有現值慶成之大學士舒赫德尚書公福隆安侍郎袁守侗梁國治均著交部議敘其隨

同辦事之軍機行走滿漢司員並著查明一併議敘
戊午

上諭內閣曰金川全境蕩平逆酋黨惡並皆擒獲獻俘
大功告竣將軍阿桂及勞績出衆之叅贊領隊大臣
等業經降旨優加恩賚列爵策勲其隨同將軍奮勇
立功之將士亦應各予錄敘以獎勤勞並著查明此
次在事之人核實造冊咨部從優議敘

己未

上諭軍機大臣曰此次平定金川曾降旨照前此平定準噶爾回部之例圖畫前後五十功臣像於紫光閣並經軍機大臣酌擬諸臣名單進呈其不敷人數行令將軍阿桂酌量增添移改並註明事實確核具奏但前次圖畫功臣曾將準部之薩拉爾等回部之霍集斯伯克等數人並列此次軍營隨征之各土司頭人內頗有竭誠効力奮勇著績者自應甄錄圖形以昭盛典著傳諭阿桂令於在事各土司內掄其功績

較著者酌擬二三人列入前五十功臣並於頭人內
擇其奮勉出衆者四五人列入後五十功臣一體註
明事實畧節核實奏聞

同日阿桂豐昇額明亮奏言逆酋索諾木及其兄
莎羅奔岡達克索諾木彭楚克甲爾瓦沃雜爾並
大頭人丹巴沃雜爾阿木魯綽窩斯甲山塔爾薩
木坦尼瑪噶喇克巴達什阿庫魯均係應行獻俘
之犯臣等遵

旨令內大臣戶部侍郎福康安督率火器營翼長訥音
並健銳火器營官兵一百人將賊酋賊目及隨從
散審八名並通事人等於二月初六日自軍營押
解起身再在省監禁之革布什咱土舍庸中旺嘉
勒亦應獻俘之犯而前年獻出之僧格桑首級併
當獻馘即令福康安一同押解進京其索諾木之
幼弟斯丹巴與其母阿倉姑阿青其妻布拉克底
土女得爾日章其姊僧格桑之妻得什爾章及索

諾木所生子克窩拉柱甲木楚女阿桑二名暨都
角喇嘛聶壘喇嘛另為一起派副都統德赫布等
即於初七日緊接押送進京其大頭人布籠普阿
納木布籠普占巴布籠普溫布甲爾瓦沙巴祖普
達什色格桑達什溫布策旺達爾什桑卡爾雅瑪
朋阿庫魯等八名及其家口三十八名又為一起
派副都統珠爾格德等於初八日押解起程此外
尚有應行送京之頭人家屬臣等按照人數陸續

分起解送奏入報

聞

癸亥

上諭內閣曰文職漢大臣由鼎甲出身者向無賞戴花翎及賞黃褂之事大學士于敏中於辦理金川軍務承旨書諭倍著勤勞昨因大功告歲特沛恩綸畫入紫光閣功臣像與其餘詞臣不同著加恩賞戴孔雀翎並賞黃褂以示優眷

三月丁酉阿桂豐昇額明亮富德舒常奏言各土
司感

恩出力並著勤勞自應於事竣時優加賞賚其歷年出力
之屯土各弁并已賞頂帶之降番頭目亦當一併
加賞臣等公同商酌計各路十二土司並土舍頭
人等七十餘名屯土各弁投番頭目等四十餘名
皆視其出力之多寡分別酌賞銀兩臣等不揣冒
昧作為

恩旨傳諭當衆面為賞給各土司頭人等皆望

闕謝

恩祇領歡呼感忭奏入

上嘉之

同日阿桂豐昇額明亮又奏言前此各路官兵打
仗其滾崖落水及受傷未獲屍身者不敢以陣亡
具報臣等亦以

國家卹典所關不得不為慎重遇有此等未明者令

各營存記俟蕩平後彙查今賊境已犁並無此項官兵其為均已殞命更無可疑應仰懇

聖恩補予卹典至此外或如砍伐木植遞送文報因公被掠似應減半予卹他如放馬割草私出被遮雖均殞身賊境而情節不同似應於減半之中再為減半予卹奏入

上勅部議奏旋經兵部奏覆應如所奏辦理

上從之

同日阿桂豐昇額明亮又奏言查木果木失事案內列入未出之文職業經先後查明請卹至武職內如守備哈文虎都司高仁原任總兵惠世溥署驍騎校崇起等二十五員及千把外委一百零九員尚無實據今自三路大兵進剿以來所有脫出漢兵投出番人以及拏獲活口臣等詳加詢問均稱未見有官員被拘在內現在全境蕩平賊巢已掃遍查各處均無此等人員踪跡其死事已無疑

義似宜一體仰邀

卹典又續據鎮將等查報有陝西固原千總楊海甘肅
寧夏千總朱紫把總趙興基等三名又四川把總
黃伸外委孫洪緒張耀三名則所有未出之千把
外委實共一百十五員均造冊送部奏入

上勅部議奏旋經兵部奏覆應請照陣亡例議卹
上從之

辛丑

上諭內閣曰前經軍機大臣議覆定西將軍阿桂籌辦
善後事宜案內令於大功告成後特設成都將軍一
員駐扎雅州統兵鎮守節制綠營並於兩金川之地
安設營汛移駐提鎮以資控馭今兩金川全境蕩平
即應駐設所有成都將軍員缺即著明亮補授一切
移駐滿兵事宜及兩金川設鎮安營諸事統令阿桂
會同新設將軍及該督提等妥議具奏

壬寅

上諭軍機大臣曰乾隆十三年平定金川後特頒詔諭
一道用清漢西番三樣字繕寫發往訓諭各土司今
大功告成宜仿照前例獎諭訓勉現已繕就清漢字
詔諭其西番字令章嘉胡土克圖繙譯仿照十三年
舊式繕寫三樣字勅諭一道即交兵部發遞川省軍
營如阿桂尚未起身進京交阿桂辦理如已起程即
交明亮遵旨通行曉諭

皇帝詔諭四川各土司曰兩金川與爾等同為內地服

屬土司曩因小金川為金川侵擾摧殘特興師征討
莎羅奔郎卡窮蹙乞命宥不加誅理應感激悛改曾
未十年郎卡即與鄰境土司構釁滋擾彼時因其與
各土司不過微隙相爭尚無大損亦遂釋而不問郎
卡既死其子索諾木等濟惡益甚與僧格桑狼狽為
奸蠶食鄰邦志圖吞併僧格桑攻圍鄂克什總督提
督親往訓諭陽雖受約陰竟抗違索諾木復乘隙殺
害革布什咱土司佔其境地負恩反噬各修碉卡抗

拒官兵此而不聲罪致討殄滅擒誅則爾等土司懦弱者將無以自存而獷悍者必致效尤滋甚王法尚安在乎特命定西將軍阿桂及副將軍叅贊大臣等統率八旗勁旅分路進兵兩金川以次削平巢穴僧格桑早伏冥誅索諾木兄弟及助惡之大頭人現俱擒獲解京獻俘備受極刑寸磔梟示此皆逆酋等罪惡貫盈孽由自作實為覆載所不容而鋤強誅暴掃蕩蠻氛俾爾衆土司得以安居樂業久無侵擾危迫

之虞此朕數年來不得已而用兵之心也今於兩金
川之地設營駐兵令提督統兵分守並於近邊添設
將軍控馭以保衛爾各土司使長享太平之福此又
朕善後之殷懷也爾土司等年來出力隨征共効恭
順甚屬可嘉已節次加恩獎賞並命照回部之例輪
班入覲除土婦及土司中之未曾出痘不能至內地
者毋庸輪班外其餘土司頭目俱按應行入覲之期
令於冬間由將軍總督提督等照料進京俾之隨班

朝賀瞻仰受恩爾等並得身受寵榮增長聞見豈非
爾等之大幸歟至爾崇尚佛法信奉喇嘛原屬番人
舊俗但果秉承黃教誦習經典皈依西藏達賴喇嘛
班禪喇嘛修持行善為衆生祈福自無不可若奔布
喇嘛傳習咒語暗地詛人本屬邪術為

上天所不容即如從前鄂克什土司因有詛咒鎮壓僧格
桑之事屢經兵革若非大兵救援幾至滅亡又如索
諾木令都角堪布喇嘛等咒詛將軍大臣今大功告

成將軍大臣等班師奏凱受朕重恩而索諾木等及所用之喇嘛等俱解京共受重罪均不能保其軀命咒詛之不足信欲害人而適以自害更顯然可見矣爾衆土司當從此悔悟永為鑒戒共秉誠順之心永荷安全之慶不亦休哉其各凜遵毋忽特諭

同日阿桂豐昇額明亮舒常桂林奏言查此時駐兵仍應佔據形勢雍中喇嘛寺建於瀕河低下之地南北兩山對峙其上鎗礮皆屬可及實非應行

駐兵之所止可酌派兵丁看守為堆貯糧石之用
奏入報

聞

同日阿桂又奏言查舒常與明亮久在一路性情
相得此時明亮奉

旨授為成都將軍所有料理善後事宜自應酌留舒常
以資欣助之益至大功已歲明亮定邊右副將軍
之印應於臣進京時一同恭繳其明亮此時文移

來往所需印信舒常處現有

欽差大臣關防可即交與明亮為暫時辦事之用俟新

鑄四川將軍印信

頒到再行更換奏入報

聞

同日阿桂豐昇額明亮又奏言查湖廣陝西綠營官兵業已全數撤回所餘甘肅雲貴官兵尚共有一萬五千餘臣等已將西南北三路甘省官兵五

千六百餘名分為十一起令總兵斐慎等帶領陸續啟行撤回甘肅所餘西寧鎮標官兵一千八百三十餘名亦隨即酌撤其貴州官兵四千七百六十餘名分為五起令總兵特成額等分帶起程雲南官兵三千八百八十餘名分為三起令總兵劉國樞等分帶起程總計至三月初八日甘肅雲貴官兵均可全撤至三路四川官兵共有一萬四千餘名應留新疆者不過六千餘人其餘亦當酌撤

臣等已交與明亮桂林侯各省官兵撤後分別應
留應撤妥協辦理奏入

上嘉之

同日阿桂豐昇額明亮又奏言查土婦扎什納木
前於掃蕩噶拉依賊巢時投出臣等擬即遵奉

諭旨遺令仍回革布什咱俾其母子完聚至伊子諾爾
布湛都爾雖年僅十四實為該處頭人番衆歸心
所有革布什咱土司自應令其承襲其土司印信

先為金川奪去現於噶拉依官寨內剗得應交與
諾爾布湛都爾祇領今衆土司均在此間伺候送
臣等起程而扎什納木與諾爾布湛都爾尚在大
營若於衆土司之前給與印信使目擊我

皇上興滅繼絕之深仁更足生其悅服當於二十七日
陳設印信傳集扎什納木母子並革布什咱各頭
人宣示

諭旨令其祇領扎什納木母子再三叩頭感激流涕即

各土司見之無不咨嗟悅服奏入報

聞

臣等謹按自古帝王底定武功昭宣文德所以垂光奕禩綬綬靖遐荒德至渥也我

皇上緯武經文奠安荒服大功告蒞天地清寧爰發德音宣布中外惟以

上蒼默佑

宗社鴻庥喜慰之餘倍深敬畏雖詩書所稱古之哲王慎

德無以加焉至於懋賞酬庸頒列爵之榮畫凌
烟之像自樞廷襄事軍餉持籌以暨戎行未弁
効順土司並蒙

獎勵備沐光榮此則

武功

文德之盛可為萬世法程者也至若

誕告各土司申明教誡於兩金川地建設營伍屯田駐
兵以資控馭保衛俾諸番各安居樂業又令向

化上司輪班入

覲得以瞻仰

天威身受榮寵至於革布什咱土婦扎什納木因其委
命投誠即令仍還舊地與諾爾布湛都爾母子
完聚搜得印信仍令祇領襲封俾撫遺衆斯又
仁至義盡

大聖人不得已而用兵之苦心中外臣民荒陬僻壤無
不共見共聞如

日月之照臨也猗歟盛哉臣等忝司編輯拜手揚
庥實不勝踴躍懼忤之至

三月癸卯

上諭軍機大臣曰昨授明亮為成都將軍節制綠營控
馭番地已明降諭旨矣該處所以設將軍之意原因
此次逆酋抗拒不法皆由歷來地方官釀成向來管
理番地各員於土司漫無經理惟附近之明正土司
等數人引而親之加以禮貌其餘則皆視同膜外衆

番已久懷不平且於軟弱者縱胥吏肆其魚肉而於
強橫者畏如虎狼益為番衆所輕遂致毫無忌憚歷
任總督如開泰阿爾泰又皆無整理之能畏葸貽悞
即從前莎羅奔卽卡之事亦未必非彼時督撫之優
柔畏事積漸而成今費五年之力十萬之師七千餘
萬之帑始能將兩金川削平掃穴俘渠用申國威而
肅法紀茲議於其地安營設汛移提鎮大員統兵駐
守並添設將軍駐邊彈壓固足以震攝諸番但所設

之將軍若不委以事權於地方文武不令其統屬考
核仍與內地之江寧浙江等處將軍無異尚屬有名
無實且番地事宜仍由地方文武辦理僅稟之總督
而行而將軍無從過問非但呼應不靈即於綏靖蠻
貊之體制亦不相合現在文綬為總督明亮為將軍
自不虞致有掣肘若將來接任之員或彼時稍存意
見即不能資和衷任事之益且恐不肖員弁久之故
智復萌不免仍蹈前轍尚不足為一勞永逸之計此

乃善後事宜之最切要者不可不及早酌定章程俾之永遠遵守自應令成都將軍文武兼轄除內地州縣營汛不涉番情者將軍無庸干預外其管理番地之文武各員並聽將軍統轄凡番地大小事務俱一稟將軍一稟總督酌商妥辦所有該處文武各員陞遷調補及應叅應訊並大計舉劾各事宜皆以將軍為政會同總督題奏庶屬員有所顧忌不敢妄行而番地機宜亦歸畫一若日後將軍或因事權專重擅

作威福擾及地方干預民事者總督原可據實陳奏
又或總督輕聽屬員之言於番地情形動多牽掣致
悞公事者將軍亦當據實奏聞朕惟覈其虛實秉公
核辦以定是非必不肯稍有偏向其應如何酌定章
程之處著阿桂等於回至成都時會同明亮文綬桂
林悉心妥議具奏

臣等謹按金川跳踉固由逆酋野性難馴究以
前此守土諸臣寬嚴失中以致積漸債事茲

天討申威俘渠犁穴全境輯寧即於其地設汛安營移駐
提鎮又

特置成都將軍兼轄文武凡番地事務及屬員考成悉
聽統理仍與總督和衷共濟既不使掣肘之堪
虞復不致事權之偏重不恃一時之有治人而
恃日久之有治法煌煌

明訓實為萬世法程者矣

乙巳阿桂明亮文綬舒常桂林奏言准軍機處原

議令新設將軍移駐雅州府但查川省將軍總督
同駐省城原所以便籌商而重節制若兩地相懸
遇有緊要番情不獲立時商確倘意見參差往返
咨詢更稽時日況現在滿兵三千每名家口即以
七八人計算已共有二萬數千人所需衙署兵房
即為不少而雅城倚山面河地勢偏仄難容挈眷
之衆滿兵似宜仍駐成都毋庸移動又川省向設
四鎮四協惟西南北一帶均屬番夷而成都距邊

甚近是以總督副都統提督均於成都駐札已偏
在西北一隅今將提督移駐美諾雖居甲壟各土
司之中若以霍爾各土司境地論之仍屬偏於東
界而東距夔州一帶則已有三千餘里其距川北
永寧亦為遙遠查提督原係專轄通省綠營有簡
拔考核將領弁員之責若移駐美諾則耳目難周
轉屬鞭長莫及且既移提督必得一標四營全行
移往自未便令其單身長戍若槩行攜眷亦勢有

所難查綠營兵丁原可隨宜居住非若滿營之必聚一處必另一城者可比今雅州城外尚有田地若於城外度地蓋房使綠營官兵散布而居未為不可是提督尚可移駐雅州毋庸移於美諾至金川地方在山巒間隔應於分設小金川兵二千名之外再於各標協營內酌留兵四千名以資分駐并現在屯兵內再酌留五百名以供差使其金川所有應安小汛並即於附近分駐各營中酌量

抽撥安設此內舊有賊首官寨之處地土亦尚稍
寬自美諾而外如小金川之底木達布朗郭宗金
川之噶拉依勒烏圍三處酌設副將二員叅將一
員均歸美諾所設總兵管轄至小金川地已瘠薄
而金川更屬崎嶇磽确且兵丁既經移駐各有差
操等事臣等悉心核計授田伊始應將兵丁三人
共給與地畝一分大率兩人當差一人耕種計一
人所耕足供兩人之食現在所餘運出兵糧共有

七萬餘石初辦屯墾時先給為各兵口食一面官辦牛具籽種但必令兵丁攜眷來居始堪永久查建昌松藩維州等處兵丁地連畝境男婦皆能習勤苦如有情願挈眷來居者照烏魯木齊兵丁搬家之例酌量官為資送其初至時照舊於應得錢糧之外給與鹽菜口糧俟墾種已成再行停止至兩金川設兵既屬無多而移駐降番亦為有限倘再有餘地當於雜谷腦五寨屯兵內遷移五百餘

戶視地方之寬窄以定居人之多寡此外地土如
再有餘查維州保縣一帶地瘠民貧婦女皆來營
貿易其內本係番人居多應行招徠開墾兵丁如
有缺出並於番人內召募充補至番地雪大風高
若照內地建蓋房屋不能經久均應分建大小碉
寨以資官員兵丁居住再官兵雖有屯種米糧其
外如鹽茶布帛之類皆為食用急需聞小金川納
木覺爾宗一帶向出些少土鹽番人尚有能熬煎

者應試辦可得鹽若干其不足之數同茶布等項
每年官為運辦數次各按物件核計成本定價銷
售又兩金川地方雖設有鎮將彈壓而屯種收糧
等事仍須文員經理臣等旋即於同知佐雜內派
委三年一換如於屯墾事宜實心奮勉即以應陞
之缺奏請即陞以上各條臣等公同酌議竊謂辦
理此事必應如前此伊犁屯墾之法逐漸試辦以
次擴充尤在董率大員通盤籌畫及承辦之文武

各員相其土宜因其日用纖悉周備庶可為一勞
永逸之計奏入

上命原議大臣速議具奏旋經軍機大臣覆奏應如所
議令將軍明亮等一體悉心妥辦

上從之

同日阿桂明亮文綬舒常桂林又奏言查兩金川
番人雖多頑悍然因有克惡頭人為之指唆是以
敢為不法今所有投番皆係節次攻勦殲戮之餘

久知大兵利害而其投出之大小頭人臣等已遵
旨將本人及家屬節次解赴京師已不患其滋事且又
於先降頭人內擇其出力可信者為之管領又有
官兵彈壓稽查更無虞稍有不馴查小金川屯田
事宜除美諾底木達布朗郭宗大板昭以及南路
之僧格宗翁古爾壘約咱章谷等處請照臣阿桂
前議各就所駐官兵授地耕種外其別斯滿一帶
與雜谷腦境地相接從前已議改土為屯應即令

雜谷腦屯弁阿忠保於此住居管轄其汗牛一處
三十七年冬間大兵一抵美諾即已全寨投降而
兩年以來飭令明正土司派出頭人權為管理人
戶尚屬完整今亦應於歷年出力之屯弁內揀派
分段管束改作屯兵其美諾相近之帛噶爾角克
及薩納木雅地方本係頭等侍衛穆塔爾所管之
地伊在營出力多年此一帶可耕之地令其管理
降番屯種其它壘頭人安本係三十七年即經投

順久在南路亦為出力即令管理宅壘屯墾所有
別斯滿汗牛及穆塔爾安本等所管降番均照屯
兵一例辦理至金川地方除官兵耕種之外查有
什爾德頭人丹比西拉布章雜寨頭人得洛思達
拉均於上年七月內官兵未克勒烏圍之先即領
全寨歸誠屢在前敵打仗又達爾卓克寨頭人色
木里雍中雖在官兵已得索隆古之後始行投出
然彼時官兵未抵其寨而該頭人即已率六寨番

民同時投出因得以勢如破竹直抵噶拉依其在
北路之投降頭人霍爾甲等打仗亦為奮勉以等
頭人所有家眷番衆擬分安於金川河東河西與
官兵相錯而居並遵

旨一體酌給牛具籽種俾得及時種藝但此時屯種之
初仰懇

聖恩姑免其租賦俟三年後均照屯練納糧之例交官
以佐兵食於邊儲更為有裨奏入

上命軍機大臣議奏旋經大學士于敏中等奏履應如所議交成都將軍明亮等詳細揀派應放土弁及管理屯弁照阿桂議定章程悉心妥辦

上從之

同日阿桂豐昇額奏言

臣等前奉

上諭令將歷次出力攻克地方繪畫戰圖以傳永久業經繪出攻得羅博瓦喇穆喇穆色溯普三圖進

呈今復將自攻上邁過爾以至掃平噶拉依其中力

戰奮攻之處分作九圖仍每圖隨以節畧恭

呈

御覽奏入報

聞

上諭內閣曰軍機大臣核覆兩金川善後事宜摺內所有番境應設綠營兵六千五百名歲需屯墾鹽菜銀七八萬兩請於江蘇安徽浙江江西湖北山東河南山西等腹內省分酌減名糧抵補一欸尚未妥協朕

平定兩金川不惜七千餘萬帑金原為綏靖邊圉一
勞永逸之計何靳此七八萬鹽菜之需況江蘇等省
營分雖居腹地亦有差操防汛之事若酌減名糧於
各該省兵丁生計殊屬有礙自可無庸裁減所有川
省歲需屯兵鹽菜之費著該督文綬即於正項內動
支至番地初定新設營汛全資將軍控馭彈壓自應
令將軍每歲至兩金川新設營分巡查兩次副都統
每年巡查一次將所有滿兵輪派隨往庶駐防兵丁

常得演習勤勞卽綠營官兵亦知所觀法

平定兩金川方畧卷一百三十三

欽定四庫全書

平定兩金川方畧卷一百三十四

三月甲寅

上諭內閣曰邇年征勦金川一切軍需糧運等項節次發帑不下七十餘萬官為辦給不欲絲毫累及閭閻而負任運供不無稍資民力業已疊次加恩將乾隆四十年以前應徵錢糧分別酌免茲兩金川全境蕩平大勲告集念川省百姓踴躍急公甚屬可嘉自宜

廣渥恩以昭優恤著將成都華陽新都漢州郫縣灌
縣德陽綿州梓潼劍州昭化廣元汶川保縣雜谷廳
雙流新津邛州名山雅安榮經清溪打箭爐二十三
廳州縣乾隆四十年分緩徵錢糧全行蠲免金堂簡
州資州資陽內江隆昌瀘州納谿叙永廳永寧中江
三臺蓬溪射洪渠縣南充大竹十七廳州縣所有四
十年分全緩錢糧蠲免十分之七其茂州松潘廳江
北廳巴縣永川榮昌璧山樂山犍為宜賓眉州奉節

雲陽萬縣巫山梁山蘆山天全州十八廳州縣四十
年前經酌緩十分之七錢糧一併蠲免溫江新繁
彭縣什邡崇寧崇慶州蓬州長壽楚江南溪富順長
寧蒲江大邑安縣綿竹仁壽井硯廣安州岳池安岳
榮縣遂寧二十三州縣所有四十年分已經酌緩十
分之七錢糧內蠲免十分之五其西充營山儀隴隣
水江津綦江南川合州涪州銅梁大足定遠忠州鄧
都鹽亭樂至丹稜彭山青武峨眉洪雅夾江威遠合

江江安二十五州縣四十年分前經酌緩十分之五
錢糧全行蠲免閬中蒼溪南部巴州通江南江馬邊
廳慶符高縣筠連珙縣興文屏山雷波廳酉陽州秀
山黔江彭水開縣大寧石柱廳達州東鄉太平新寧
平武江油石泉彰明西昌冕寧鹽源會理州越嶲廳
三十四廳州縣四十年分前經酌緩十分之五錢糧
內蠲免十分之三其各營縣番民認納銀米前已降
旨緩徵著並將該年夷賦一體按照分數蠲免俾民

番均得普沾實惠用示慶洽武成嘉獎勞民至意該部即遵諭行

臣等謹案川省軍務前蒙

諭旨將乾隆四十年以前應徵錢糧分別酌免已為格外

恩施茲因全境蕩平

念川省百姓踴躍急公復沛

殊恩將乾隆四十年全省正供分別普行蠲免

恩施稠疊有加無已漢土兵民自無不歡欣鼓舞仰
一人之有慶也

甲辰阿桂豐昇額明亮奏言霍爾章谷納林沖孔
撒三土司懇請同甲壘土司一體進京叩謝

天恩查此三處雖未隨軍打仗然派令土兵在革布什
咱甲魯一帶防範賊人已經數載且各派烏拉挽
運軍糧亦為恭順出力所有霍爾章谷納林沖孔
撒土司似應照綽窩土司之例給與花翎頂戴再

革布什咱土舍諾爾布湛都爾年雖十四現回革
布什咱管理地方據土舍頭人稟稱附近各土司
均賞戴翎枝獨諾爾布湛都爾無翎不足以彈壓
衆人請將大頭人達爾結等打仗奮勇所得之翎
擲給諾爾布湛都爾頂戴等語情詞甚為懇切
等相商一併賞給花翎俾知

天朝厚恩有加無己益足以深其感激

同日劉秉恬富勒渾鄂寶郝碩顏希深奏言查軍

火等項兩金川地方現已設鎮安營為巡防操練
所必需應於噶拉依勒烏圍美諾鎮協土貢駐札
處所運駐備用所有三路軍營各站共存礮子三
十萬八千九百五十顆又七百六十包鎗子一千
一百三十七萬一千五百三十一顆又一千九百
三包火藥二十一萬八千八百九十九斤又二百
五十一包火繩七十四萬八千三百五十一盤噴
筒二千六百五桿火彈六千二百三十九個戰箭

二萬二千五十六枝烏鎗三百五十五桿銅礮三位鐵礮五十三位除南路軍火業已運貯章谷馬爾邦兩處並原存勒烏圍噶拉依兩處藥局以及酌留底木達大板昭外其餘各按道里遠近酌量分運噶拉依勒烏圍美諾以憑撥用至現存生鐵五十六萬三千一百餘筋熟鐵二萬九千五百餘斤又三百二十三筒查鐵介價值甚輕運脚甚重自不便一體轉運徒致多糜應即於附近營汛交

收並損壞之鐵礮鳥鎗等項分晰記明檔案發交松茂道查禮等移明該鎮將如有需用之處均可隨時支領均奏入

上諭軍機大臣曰阿桂等奏霍爾章谷納林沖孔撒三土司稟稱願同甲壘土司一體進京謝恩已準其所請并給與革布什咱土舍花翎所辦甚好霍爾章谷等土司既誠心感戴自應準令同衆土司入覲著交明亮等妥協經理將應行朝覲之各土司按其序次

大小遠近分派平允做照回部年班仍遵前旨於冬至月起程歲底到京今年係初次朝謁自應多派數人此後按年均勻輪派其來朝者承受恩寵回巢傳說衆土司聞之自必倍加踴躍又據劉秉恬等奏三路軍營各站所存火藥礮子鎗子等項酌量分運噶拉依等處收貯以憑撥用等語此項火藥礮子鎗子為數太多今兩金川之地雖已設鎮安營即美諾勒烏圍兩處寬餘存貯及分給各營預備操演亦不須

用至如許若過於多積徒存無益且恐附近番人等
乘間竊取或綠旗兵丁盜賣甚有關係自應於美諾
勒烏圍噶拉依有總兵副將處所存貯稍寬其分給
各營汛者酌數備用餘俱就近運送口內營協較大
之處加謹收貯以備內地各營撥用現在站夫尚未
撤完即令其歸途帶運亦屬甚便又火彈一項專為
攻礮摧卡而設今兩金川已經平定設營駐守火彈
無所用之據稱尚存六千二百三十九個即以每個

貯火藥三五斤而計亦可得淨藥二三萬斤自應併
運內地仍解作火藥存貯其噴筒二千六百五桿如
已裝火藥者亦一併酌辦至各處原損之鐵礮鳥鎗
存留無用自應銷燬其所存生熟鐵幾及六十萬斤
更覺太多但其價值本輕自不值運送糜費而久存
亦屬無益除留給各兵番作為農器鍋具外有可設
法經理者並當酌量籌辦庶不至歸於無用以上各
條著交明亮舒常桂林悉心妥酌辦理

同日明亮舒常桂林奏言查兩金川地勢遼濶惟
噶拉依為適中之地臣等公同商議現已駐札該
處一切事件既可面商妥速料理而分路查察亦
不致顧此失彼目下應留川省綠營官兵六千名
俱已如數挑出行令總兵五福高璚即帶往分駐
查五福係由維州協陞授松潘鎮於小金川一帶
最為熟悉已令其在美諾駐防高璚隨征數載於
口外番情金川山形道路亦漸領畧即派令赴駐

勒烏圍與噶拉依相去不遠

臣

等皆可隨時照料

現今各將派撥所轄官兵逐一安營設汛

臣

等仍

親加察看率同妥協辦理其餘川省滿漢官兵亦

經飭令該管將弁即日分起緊隨各省官兵之後

帶領回省各歸本營至耕屯所需農具籽種必按

戶口之多寡授地之廣狹以及土脈所宜斟酌籌

辦方為有裨農功茲已飭令松茂道查禮建昌道

賈凝吉即就現有之兵屯降番等所需籽種如糶

耙蕎麥之類農具如犁耙耨鋤之類皆即約核數
目速為儲備散給再_臣等現駐口外籌辦善後事
宜一切文報往來必藉馬塘馳遞查南北兩路馬
匹已經次第全撤其西路自噶拉依美諾由桃闊以至
省城一帶現已飭令每站各酌留馬六匹以資遞送

同日劉秉恬富勒渾鄂寶郝碩顏希深又奏
言_臣等前因大兵由瑪爾古當噶一路進取
賊巢各營卡俱在山頂之上糧隨兵進勢不能不

翻越層山尾隨供運是以由西里等站取道轉輸
今官兵全數凱旋祇須僨運存糧若改由勒烏圍
沿河行走直達噶拉依貯糧處所更為妥便現已
將西里各站裁撤所有人夫帶赴勒烏圍沿河安
設將噶拉依應存米數加緊趕運完竣均奏入報
聞

四月壬寅阿桂豐昇額奏言欽奉

諭旨以大功告藏於紫光閣圖畫功臣像復奉

諭將已故之副都統莽噶察博靈阿及提督馬全總兵
曹順侍衛明仁等分別列入並令將土司頭人掄
其勞績著錄圖形伏查各土司均係派兵助剿惟
綽斯甲土司雍中旺爾結曾經臨陣督兵木坪土
司嘉勒燦囊康亦屢至軍營其土舍頭人內惟鄂
克什土舍雅滿塔爾綽斯甲布土舍綽爾甲木燦
與屯弁阿忠保穆泰爾及小金川投番侍衛穆塔
爾布拉克底頭人雍忠爾結俱屬奮勇著績似可

列入後五十功臣之內伏俟

聖明裁定奏入報

聞

同日阿桂豐昇額又奏言

臣

等至成都將應入凱

宴官負兵丁酌分四隊稍為更調除奎林和隆武

仍帶頭隊於三月十五日起程外額森特帶第四

隊官兵於十七日起程

臣

阿桂

臣

豐昇額應辦事

務今已完竣

臣

豐昇額帶第三隊官兵於二十一

日起程臣阿桂帶本隊官兵於二十四日起程其
入宴人數現經造冊送軍機處辦理奏入報

聞

同日阿桂豐昇額文綬奏言伏查大兵進剿有自
行投出及被拘留之番衆其送在成都暫時安插
收禁者此時自宜分別辦理如金川番人內彤錫
一名於三十七年三月內帶其妻投在西路軍營
業蒙

恩賞翎頂嗣因其不能得力遣回成都今應將伊夫婦
送京居住其餘三十七年即行投出及四十年投
出後家口為逆酋所害者均應交明亮桂林等酌
量分在兩金川地方令其屯墾其於三十八年投
出者應分給附近土司收管安插至四十年內因
官兵四面圍困始行投出除監斃外未便仍留本
土自應解京分賞又小金川番人於三十七年為
賊酋赴南路投稟者除當經解京及監斃外亦應

一併解京分賞奏入報

聞

同日明亮舒常桂林奏言綠營征兵舊例月支鹽菜銀九錢日支口糧米一升嗣奉

恩旨將日支口糧米照滿兵例改為八合三勺而於月支鹽菜銀九錢之外加給四錢今現留兵屯六千五百名請仍照征兵舊例每日各給米一升其按月加給銀四錢即行裁去至餘丁一項本因征兵

各土司地方購買秋蕎籽種隨到隨給內地所辦
籽種亦諭令該司道於履勘時相度土宜統俟運
到即可分別高下燥濕量為散給其需用耕牛若
由內地踰險解往不惟疲斃堪慮抑且緩不及事
茲已派員於素產耕牛價值較減之霍爾核磨從
噶克等處設法採買就近分撥耕犁至農具亦並
增調鐵匠將口外所存生熟鐵斤隨地設爐仿照
製造再查番境水道紆回春潦夏漲動輒阻隔

臣

等現由直捷路逕於總匯要口將舊存船隻酌量
移設仍將所餘船料迅速趕造以資濟渡並於留防
綠營內挑取重慶一帶素習水性之兵令其各就
所駐附近之地撐駕應役奏入報

聞

同日明亮舒常桂林又奏言各處降番經臣等欽
奉

諭旨以伊等俱嫻於耕作兩金川又有可耕之地莫若

即用此等降番就所在墾耕安業其前次暫交各
土司收管應調回者現在陸續調回分交該管頭
人名下令其各歸編管處所就地屯種但未便照
兵屯之例按給口糧而蠻地秋蕎等項須自五月
播種至八九月始可登收此時方屆初夏誠恐日
食無資臣等酌擬借給數月口糧每二人日支口
糧一升並將賊巢內剗出蕎麥等項搭配散給俟
本年秋成之後察看收穫情形再將所借口糧酌

量定限按季歸款奏入報

聞

同日文綬奏言番地安設營汛留駐官兵應派定
營分員名核其出征先後預計年限班次及支給
官役兵丁鹽糧均宜合計內地營伍通盤籌酌其
屯墾田土凡附近營汛之地應先儘兵丁屯練勘
丈分撥次及遷移屯兵招募民戶務使聲勢聯絡
再將安插降番撥給地畝令其錯處耕雜馴就鈐

束其餘僻遠山谷現在耕種不到之地徐俟生聚
繁庶以漸開拓且番地耕種情形與伊犁等處多
有不同兵民番戶屯種田地每人各撥若干應就
人數多寡地勢廣狹變通酌撥俾地利人力兩無
閒曠其遷移招寡之屯戶及情願携眷住屯之兵
屬官為資送亦與伊犁等處概用車輛計算路費
不同應參酌比較辦理歸於省便又留辦屯田官
員書役例給公費口糧亦應仿照伊犁等處之例

妥議酌定至如藝種糧食之外各項菜蔬瓜豆應
於內地覓種栽蒔以佐口食又油鹽茶等項亦須
內地運往現今成都等處辦理酌量散給仍照將
軍阿桂會奏善後條款核計成本銷售歸項奏入
上嘉之

丙午

上諭軍機大臣曰侍郎福康安自軍營回京其解到各
番犯內有庸中旺嘉勒一犯原係革布什咱土舍自

投入金川勾引索諾木等將土司色楞敦多布戕害
是革布什咱之滅亡皆由其構釁逞兵情罪最為可
惡著傳諭舒赫德等即派妥員鎖解行在審辦毋致
疎虞

臣等謹按

天討有罪刑章所及一本至公庸中旺嘉勒以革布什
咱土舍甘投金川逆酋將伊土司戕害其干紀
不韙實難逭斧鉞之誅

皇上聖武布昭本為各土司義憤同申永銷蠻觸而於
俘囚解京之日復以庸中旺嘉勒搆釁情節傳

諭鎖解

行在審辦凡屬土司益當畏

威懷

德知禍福之皆由自取而非有一毫私意於其間也

上又諭軍機大臣曰上年曾諭令將軍等以攻得兩金
川地方有形勢最號險惡經我兵艱難力戰而得者

諸將士勞績尤多均宜繪畫得勝圖以彰武成盛典
今已據阿桂節次繪就進呈明亮一路亦有地當險
要如宜喜達爾圖等處自應一體繪畫著明亮逐一
查明繪圖貼說呈覽

戊申軍機大臣奏言 臣等遵

旨將解到

行在各番犯逐加鞠訊有喀什巴拉木奔一犯患病
沉重據逆目丹巴沃咱爾供稱該犯係金川小頭

人曾在碾占領兵守卡應請

旨將喀什巴拉木奔即行斬決庶不致倖逃顯戮奏入
報

聞

辛亥

上諭內閣曰協辦大學士尚書公阿桂著仍在軍機處
行走並著紫禁城內騎馬

上諭內閣曰朕於本月二十七日由黃新莊行宮御龍

在營打伏准令隨帶以供樵汲目下分設營汛各處兵丁砍運木石趕砌碣房尚屬無暇可否暫令仍帶餘丁俟碣房工竣概行裁撤奏入

上諭軍機大臣曰據明亮等奏現留兵屯請照征兵舊時例每日給米一升其加給銀四錢即可裁去查屯兵本非打仗征兵可比所有加給銀數自應節裁即每日給米一升亦暫時籌辦則可將來酌定屯兵永遠章程自當照例妥議至稱餘丁一項可否俟碣房

工竣裁撤等語此項留屯之兵原不應有餘丁若以趕築碉房需用工作則屯土兵練等素所熟習儘可役使即云此時兵丁無暇或資餘丁之力亦當立定限期或半月或數日示以節制庶不致久延糜帑將此傳諭明亮等知之

同日明亮舒常桂林又奏言蠻疆地畝據該司道等分路履勘次第丈出而節令已過立夏必須及時畀以可耕之具臣等業派熟諳弁分往附近

千兩叅贊大臣海蘭察額森特俱緞二十端銀一
千兩領隊大臣奎林和隆武福隆安普爾普烏什哈
達海祿俱緞十二端銀五百兩領隊大臣珠爾格
德德赫布阿爾都依蘭保俱緞十端銀二百五十
兩

乾清門巴圖魯侍衛阿蘭保彰靄那木札泰斐英阿
富寧俱緞十端銀一百八十兩巴圖魯侍衛及巴圖
魯戴孔雀翎官員三十八員俱緞八端銀一百五十兩

乾清門侍衛蒙古爾烏爾圖納遜格勒爾德及藍領
侍衛二十二員戴孔雀翎侍衛官員兵丁三十四
員俱綴六端銀一百兩叅領副叅領委署叅領佐
領郎中員外郎主事四十一員戴藍翎驍騎校七員
俱綴六端銀六十兩戴藍翎驍騎校兵丁千總一
百八員筆帖式二員護軍校驍騎校四十六員藍
翎長二十七名俱綴五端銀四十兩前鋒護軍領
催馬甲三十八名俱綴四端銀二十兩至應賞將

軍大臣侍衛官兵丁荷包並請照二十五年之
例分別賞給奏入

上諭曰明亮著照豐昇額賞給一分緞足荷包給伊任
所銀兩給付伊家

同日軍機大臣又奏言侍郎福康安解俘到京其
隨來之官員兵丁計一百餘人內有經將軍阿桂
於凱宴冊開送者應於入

紫光閣宴賞外其餘人等應請照例俟受俘禮成後

賜解俘各官宴及蟒緞朝服帽靴一分銀一百兩兵丁賞給羊酒銀二十兩奏入報

聞

同日刑部奏言逆酋索諾木之母阿倉現在發疹請

旨辦理奏入

上諭軍機大臣曰逆酋索諾木之母阿倉係應正法之人倘因病身死轉得倖逃顯戮著傳諭舒赫德等即

將阿倉押赴市曹處斬至索諾木之姑阿青與逆目
丹巴沃咱爾同謀造意二人實此事罪魁連日審訊
丹巴沃咱爾各犯所稱阿青罪惡衆供僉同著將供
詞抄寄舒赫德等令其嚴訊阿青確供照律凌遲處
死

甲寅軍機大臣奏言 臣等遵

旨嚴訊逆目丹巴沃咱爾等並以搶至維州橋之語令
庸中旺嘉勒與丹巴沃咱爾質對丹巴沃咱爾氣

息漸微應請

旨即行凌遲寸磔庶不致倖逃顯戮庸中旺嘉勒應否

亦即凌遲處死請

旨遵辦奏入報

聞其助謀之阿木魯綽沃斯甲七圖甲噶爾思甲布都

甲喇嘛雍中澤旺堪布喇嘛色納木甲木燦並奉

旨凌遲處死

平定兩金川方畧卷一百三十四

欽定四庫全書

史部

平定兩金川方略卷一百三十五

給事中臣查善長覆勘

總校官原任侍講臣王燕緒

欽定四庫全書

平定兩金方畧卷一百五十五

四月乙卯劉秉恬富勒渾鄂寶郝碩顏希深奏言

後路各站存糧數目經

臣

等奏明運交應貯地方

並飭委口外總辦糧務之司道等督催趲運所有

勒烏圍噶拉依美諾駐兵最多處所現在運貯米

石以之支放中糧甚屬充盈各路臺站除卧龍關

一路聽督臣文綬等酌辦外其大板昭一路自桃

關汶川縣噶拉依計程三十餘站各處存米必須
由後而前運完一站即可裁撤一站雖附近軍營
等處未即掃數全清而為數無多均可尅日完竣
至八旗及各省官兵分由楸砭卧龍關兩路而行
現已全過成都川省官兵除兩金川地方留駐外
餘皆陸續由桃關進口各回原營奏入報

聞

丙辰軍機大臣

奏言

伏查解京審犯除業經凌遲

袍袞服乘十六人金漆亮轎用騎駕鹵簿導至郊
勞臺大駕鹵簿即於郊勞處排設隨從郊勞之王公
大臣俱穿蟒袍補褂禮成後仍乘十六人金漆亮轎
騎駕鹵簿及饒歌樂導至行宮用膳更行衣隨從王
大臣官員及凱旋之將軍大臣官員等亦俱更換行
衣隨從朕由行宮乘八人轎至趙新店頭分尖營換
車二分尖營著移設於廣寧門闕廂外騎駕鹵簿即
先赴彼處預備朕至二分尖營後仍乘八人轎用騎

駕鹵簿導行進宮至禮部奏請在京王公大臣官員
於二十六日至初一日此五日穿蟒袍補褂朕於二
十七日進宮隨駕大臣官員著於二十八日至初一
日穿蟒袍補褂

同日軍機大臣奏言伏查乾隆二十五年凱旋筵
宴將軍大臣侍衛官員兵丁

恩賞緞疋銀兩有差此次應請照例賞給將軍阿桂緞
六十端銀六千兩副將軍豐昇額緞四十端銀四

正法外其應獻俘之逆酋索諾木等及應正法各犯_臣等謹核擬請

旨交與兵刑二部遵照至各犯家屬內如山塔爾薩木坦等家口軍營原單未將妻子及跟役等分析開註此內如有年已及歲之子應行正法年未及歲者永遠監禁並請交刑部將各犯妻子跟役查明分別辦理奏入報

聞

已未刑部奏言臣等接准軍機大臣奏片遵查番
犯家屬內蒙古阿什咱阿拉之子阿咱納年已十
八應擬正法山塔爾薩木坦之子查木巴等年未
及歲應擬永遠監禁其應擬為奴之犯屬並經查
明妻妾子女及跟役等擬給索倫為奴者七十五
名擬給功臣之家為奴者六十三名奏入

上諭軍機大臣曰舒赫德等奏逆犯家屬擬給索倫為
奴者七十五名為數稍多此等人犯若聚於一處日

久恐不免滋生事端著傳諭舒赫德等酌其情罪尤重之家屬發往伊犁給厄魯特為奴其餘分發索倫及三姓地方為奴

庚申明亮舒常桂林奏言竊查兩金川地勢延袤綠營兵丁屯墾駐守之外其餘偏僻山坡尚有可耕之地應遵

旨即以該處降番令其就地耕作不惟免移置他處編管之煩且土宜皆其素習更可收墾耕安業之効

其應設頭目臣等將出力土弁兵及投出番人內
逐加詳察擇其實心出力人尚謹懃者並投其勞
績之等差與投誠之後先賞以土守備土千總等
職銜使各隸於綠營統轄之下遇應辦事務報明
該管營員由臣明亮等指示辦理謹擬放管理小
金川底木達布朗郭宗別斯滿等處投番土弁內
土守備阿忠保一員土千總僧格一員土把總阿
思達壬占朋等二員土外委多日爾結納木結僧

格雍中太等四員共八員管理昂噶爾角克礪九
寨蚌魯爾八寨等處投番土弁內土守備穆塔爾
一員土千總納朗一員土把總切泰松爾結斯甲
等二員土外委甲洛色楞肯彭壬堅等四員共八
員管理小金川僧格宗投番土弁內土守備安本
一員土千總色爾結一員土把總溫布阿柰等二
員土外委綽窩太丹巴申朗朋朗太斯達爾結克
楞本朗卡結章布木班瑪札朋等十員共十四員

管理汗牛投番土弁內土守備工喝一員土千總
倉旺多爾濟一員土把總雍中策楞草宗多爾濟
等二員土外委格宗阿結多爾甲等三員共七員
以上小金川各境內及汗牛投番前經阿桂會奏
改土為屯應照屯兵額設土守備等官之例將擬
放土弁等亦授為額設伴益感奮盡心經理又擬
放管理金川河東投番暫充土弁內土守備丹比
西拉布一員土千總色木里雍中一員土把總策

旺得洛思達拉綽瓦斯甲僧格爾結等四員土外
委草什甲木燦木了赤本納爾甲旺爾丹登珠斯
丹增阿凱昇格錫科爾甲色楞雍中等十員共十
六員管理河西投番暫充土弁內土守備達固拉
得爾瓦一員土千總生根一員土把總綽窩僧格
結甲爾瓦阿咱拉等四員土外委甲噶邦思達納
色朗噶登朋克楞本壬青雍中什拉壬青窩則柯
布壬青等十員共十六員所有丹比西拉布等本

係金川頭人或於未克勒烏圍之先即來投順屢
在前敵打仗或率各寨番民同時納款此等頭人
及其家眷番衆前經阿桂會奏令在金川地方一
體屯種但此時未便一例改土為屯現今丹比西
拉布等暫充土弁分管屯種各番仍於留駐屯弁
內擇其明白妥協者兼管其事互相督察如丹比
西拉布等果能實心管理將來著有成效臣等酌
量情形再行奏請改土為屯於番地屯務自有裨

益奏入報

聞

同日明亮舒常奏言

臣等欽奉

諭旨凱旋之後當繪圖以垂示永久查自達爾圖歷西北而東南至噶拉依一帶所有踰險摧堅經將士奮勇攻勦而得者計應繪作戰圖八幅並遵

旨將帶兵大臣及勇銳將領逐一簽註圖內仍將攻勦機宜撮敘節畧恭呈

御覽奏入報

聞

同日軍機大臣奏言副都統三寶在軍營打仗傷重先行回京將軍阿桂等造送凱宴冊內未經列入但三寶係奮勇出力之人今傷漸平復已能行走應否入於

紫光閣筵宴伏候

欽定奏入

上命三寶入宴

辛酉

上命三寶應賞緞疋銀兩照奎林等賞給

壬戌文綬奏言川省各路臺站次第裁撤據總辦
屯務松茂道查禮建昌道賈凝吉以安營設屯尚
有運送差使請自桃關由卧龍關美諾一路至噶
拉依勒烏圍各站每站留夫五十名工價口糧照
例支給又兩金川番地分委各官查丈田土試辦

金沙土鹽等事往來周歷所帶文冊鍋帳行李器具亦須夫背送請按差員應得騎馱折給人夫其口糧工價暫照隨營長夫例支納統俟善後事務辦竣俱行裁撤臣札商明亮舒常桂林等以口外現在尚資夫力自應暫准酌留惟向來臺站或一站派官一員或兩站派官一員經理夫糧馬匹諸事今宜量為歸併每官一員除應管本站外兼管上下兩站現飭該道等查照酌辦至將來善後事

務辦定站夫全撤之後仍有往來運送差使必須
另為經久之計伏查新舊站路凡有口外運送各
臺糧餉及差使等事由打箭爐飭明正土司僱撥
蠻夫烏拉給與腳價運送其經由裏塘巴塘等地
方該土司亦一體僱辦接遞今西路由桃關出口
經瓦寺鄂克什境中路由雅州出口經本坪境北
路由雜谷出口經梭磨境均應飭照舊例令該土
司頭人僱撥蠻夫烏拉應用其由益固至噶拉依

勒烏圍等處即於雜谷移往屯戶及安插種地降
番內就地酌撥一體給與腳價以資運送奏入
上從之

同日明亮文綬舒常桂林奏言欽奉

諭旨以成都將軍控馭諸番其管理番地文武各員並
聽將軍統轄臣等遵

旨酌議管理番地各員文職如松茂建昌二道及該道
所屬之府廳州縣分管口外各土司者武職如松

潘建昌二鎮阜和一協及所屬分管口外各土司
者均聽將軍統轄遇有陞遷調補應叅應訊及大
計舉劾等事亦應會同將軍考核至將軍所轄文
武各員尋常事故接卸日期並令一例通報以備
查考奏入

上從之

同日明亮文綬舒常桂林又奏言西路汶川縣地
方界鄰瓦寺中隔岷江自縣屬桃關沿江而行至

縣城外向設索橋一道過橋出口經礪頭至草坡
共程三站乾隆十二三年進征金川即於桃關另
建索橋出口經大邑坪至草坡計程二站迨事竣
後桃關撤去索橋仍由汶川縣出口此次用兵復
建桃關索橋兵行糧運均歸近捷今軍務告竣而
番地設鎮屯田餉道差務仍須往來口外與十二
三年情形不同自應經由桃關索橋出口以免迂
繞惟是桃關僅山間過路一小村落並無額設官

弁兵役其地距汶川縣城四十里遇有邊外緊要
差務鞭長莫及竊查保縣設有縣丞一員保縣政
務尚簡可以裁移應請將保縣縣丞移駐桃關改
為汶川縣縣丞一切稽查往來接遞差務均令該
縣丞管理並派千把一員帶兵三十名長駐該汛
協同辦理奏入

上從之

癸亥

上諭軍機大臣曰逆酋索諾木之妻得爾日章現經議
給功臣家為奴但念伊係布拉克底土司之女著改
交刑部永遠監禁

臣等謹按大軍掃蕩賊巢檻車累俘用彰

天討逆酋索諾木之妻得爾日章刑部擬給功臣家
為奴律有明條

皇上德威遠播法外施仁

特降諭旨以得爾日章係布拉克底土司之女改為永

遠監禁該土司宣力抒誠既屢沐

溫綸獎勵而其女之照律緣坐者復得仰邀輕典不惟

布拉克底土司身荷

洪慈自當感激涕下即徼外諸番無不鼓舞歡欣也

丙寅獻俘於

太廟

社稷侍郎福康安率解俘將校以逆酋索諾木及莎羅
奔岡達克索諾木彭楚克甲爾瓦沃咱爾逆目山

塌爾薩木坦布籠普占巴雅瑪朋阿庫魯等皆白
組繫頸並函封逆酋僧格桑首級自

天安門入至

太廟街門外置僧格桑首級於地俟承祭王至逆酋索諾
木等北向跪伏承祭王入行禮畢侍郎福康安率
諸將校以逆酋索諾木等及僧格桑首函至
社稷街門外俟承祭王入行禮如前儀

丁卯將軍阿桂副將軍豐昇額等振旅凱旋至黃

新莊恭請

聖安

賜將軍以下至官兵膳於

行在所

戊辰

上幸良鄉城南行郊勞禮正南為壇壇上左右列肅

上龍袍袞服騎駕鹵簿導行將至壇軍士鳴螺鐃歌樂

作將軍副將軍暨叅贊領隊侍衛官兵戎服跪迎

上登壇拜

天自將軍以下及在京王公大臣皆隨行禮

上陞座將軍副將軍等率衆行禮畢復趨至

御座前跪行抱見禮

上撫勞之傳

旨賜坐將軍以下坐西幄在京王公大臣坐東幄

賜茶畢馬上凱歌樂作

賜將軍阿桂副將軍豐昇額叅贊大臣海蘭察額森特

領隊大臣奎林和隆武福康安普爾普

御用鞍轡馬各一匹扈

蹕至

行宮

命賜成都將軍明亮

御用鞍轡馬一匹即付其家祇領

上諭內閣曰禮部所奏二十八日受俘儀注將軍等入
於百官班內在午門前行禮但將軍等於郊勞及

宴兩次俱有行禮之處將軍及自軍營回京之在御
前乾清門行走者俱著扈從登午門樓不必入班行
禮止須令福康安帶領押俘將校等在午門前行禮
又

諭曰將軍阿桂等所用得勝靈纛九杆著於紫光閣武
成殿敬謹尊藏

已已行受俘禮侍郎福康安率解俘將校以逆酋
索諾木及莎羅奔岡達克索諾木朋楚克甲爾瓦

沃咱爾逆目山塔爾薩木坦布籠普占巴雅瑪朋
阿庫魯等並函封逆酋僧格桑首級豫琿於

午門外之西大樂鼓吹金鼓振作

上龍袍袞服

御午門樓侍郎福康安率解俘將校行禮畢令逆酋索
諾木等北向跪伏置僧格桑首級於地兵部尚書
跪奏平定兩金川生擒逆酋索諾木等並獲逆酋
僧格桑首級謹獻

闕下奉

旨交刑部刑部尚書跪領

旨兵部司官以逆酋索諾木等及僧格桑首函授刑部

司官自

天安門出王公百官行慶賀禮

上幸豐澤園

親訊逆酋索諾木等罪狀遂

命刑部將索諾木及莎羅奔岡達克索諾木彭楚克甲

爾瓦沃咱爾逆目山塔爾薩木坦凌遲處死仍梟
索諾木等及僧格桑首級於市

上御紫光閣行飲至禮將軍副將軍暨叅贊領隊
乾清門侍衛等及奉

旨入宴之王公大臣列坐

閣內從征官員列坐階下左右幄內

上親賜阿桂豐昇額等卮酒奏凱宴樂各番人等以次
歌舞畢退

庚午逆目布籠普占巴雅珊朋阿庫魯及情重者
犯並斬於市

同日刑部奏言川省解到金川喇嘛倫珠布旺丹
等十一名小金川喇嘛楚爾齊穆彭楚克等十七
名臣等遵

旨研訊並非頭人子弟均在西藏學藝年久未歸應請
分別安插將倫珠布旺丹等十一名解往熱河分
給各喇嘛寺役使楚爾齊穆彭楚克等十七名留

於京城各喇嘛寺役使並令各該管官嚴加管束
奏入

上從之

五月辛未崇上

聖母皇太后徽號

上恭奉

冊

寶進表行禮

御太和殿將軍阿桂副將軍豐昇額暨叅贊領隊侍衛
等官謝

恩行禮畢王公百官進表行慶賀禮

頒詔天下

奉

天承運

皇帝詔曰朕懋膺

景命寅紹丕基殫夙夜以勤求準仁義而並用惟期遐邇

嚮化海宇入安益臻熙洽之隆長享昇平之福茲當
殄靖蕃落掃蕩蠻氛定一勞永逸之模際偃武敷文
之會鴻勲既集慶典宜申兩金川者錯居蜀徼久隸
土司毒實等於虺蛇惡更甚於梟獍懷以德而不知
感藏其奸而無所懲索諾木則貆又生羅僧格桑則
蛩還附屨始猶諒爭其蝸角尚無庸取彼鯨鯢乃敢
違約以噬鄰浸至脩恩而拒命無可赦當正其罪不
得已斯加以兵爰收鄂什之侵疆倒懸是解遂入美

諾之深穴傳檄而平兇渠竟喙走以潛遁逆豎敢顏行之顯抗輒爾逞謀於射影公然徼覷於僨轅尤覆載之所不容誠神人之所共憤於是申命元戎俾專薄伐簡八旗之勁旅分兩道以徂征勇勵則所向無前算勝則有攻必克梯峻若從天而降履險或絕地以登賊衆每悉力以負嶠我軍屢出奇而扼隘殲厥徒醜非竄即誅摧乃卡礪靡堅弗破勒烏圍先翻其狡窟啗拉依旋擣其窮巢諸寨因次第翦除兇惡

亦駢聯就縛是役也帑藏幾費七千餘萬閭閻未煩
粒粟寸絲諸帥臣歷百戰之辛勤余一人經五年之壽

畫仰賴

昊蒼昭貺

列祖洪庥事恒集於因難幸茲揚武功克底於可久願永
洗兵入桃關而星弧載櫜謁

橋山而露布適奏遂乃祇奉

安輦言舉東巡禮

岱宗而祝

慈禧告

闕里而宣鴻捷郊臺循勞還之典午門行受俘之儀紫
閣酬庸第勲績而膺懋賞

璇闈送喜歸美善以晉

尊稱謹告

天

地

宗廟

社稷於乾隆四十一年五月初一日率王公文武羣臣

恭捧冊寶加上

聖母崇慶慈宣康惠敦和裕壽純禧恭懿安祺

皇太后徽號曰

崇慶慈宣康惠敦和裕壽純禧恭懿安祺寧豫

皇太后

寧常受福符來備於箕疇

豫永延和叶利行於義畫用光大禮特沛覃恩

一五嶽四瀆遣官致祭

一歷代帝王陵寢遣官致祭

一嶽鎮海瀆廟宇及歷代帝王陵寢該督撫查勘應修葺者動項報銷

一在京文武官俱著加一級任內有降級處分者即予抵銷

一承辦軍需之戶部軍需局兵部議功所量子議叙

一軍營自將軍叅贊至將弁等其勞績懋著者所有
革職降級留任處分概予開復其無出衆勞績而曾
經戰陳者所有降級留任處分亦著加恩寬免

一大兵經過地方辦差官員俱屬急公黽勉著各該
督撫查明咨部議敘

一大兵所過州縣除侵盜錢糧及貽誤軍需外一切
降罰處分事在五月初一日以前者概從寬免

一川省軍營前後所調馬步兵丁借支行裝銀兩例

應於餉銀內分扣還項者加恩展限三年

一傷病回營兵丁不能充伍者該管將弁查明本家
如有子弟至戚可以教練差操即令頂名食糧免致
失所

一滿兵跟役脫逃如無偷竊軍械馬匹等情著照前
降寬餘丁諭旨交部核擬發遣

一臺站官員已有旨交部議叙其驛站夫役人等
軍興以來甚屬勞苦著該督撫加意撫恤

一在京滿洲蒙古漢軍馬步兵丁俱著加恩賞給一月錢糧

一京城巡捕三營兵丁著加恩賞給一月錢糧

一滿洲兵丁披甲隨征効力被傷不能披甲及年老有疾退閒者均加賞賚

一國子監貢監生及各學教習俱免監期一月

一直隸山東軍流以下人犯業因蹕路經由降旨減等發落其在京刑部及各直省軍流以下人犯並著

加恩槩予減等發落

一凡流徒人犯在流徒處所身故其妻子情願回籍者該地方官報明該部准其各回原籍

一各省要路橋梁間有損壞者地方官查勘應修之處詳報督撫奏明修理

一各處養濟院所有鰥寡孤獨及殘廢無告之人有司留心以時養贍毋致失所

於戲帡鴻禧於六幕揚

獻昭者定之祥頒鳳詔於十行會極溥平康之治布告天下咸使聞知

臣等謹按王者政令取象風雷茂時育物施命四方天道所以無為成化也武功既播文德爰敷聖人所以不言成教也我

皇上以金川肆梗宵旰勤勞前後五載事非出於得已功惟斷而乃成邊裔牧寧敷天共慶於是

覃敷愷澤嘉興維新溯昭格於

珠丘展

時巡於岱岳

慈寧薦號

闕里告成神人洽和遐邇風動鉅典懿鑠古無倫比
要惟

皇上本神武不殺之心垂久道化成之治用能綏靖八
荒和恒六宇非僅如殷宗之伐鬼方周王之克
淮徐見於記傳稱述已也

壬申刑部奏言逆酋索諾木及其兄弟大小頭人等暨各犯家屬二百五十餘人械送至京歷蒙

廷鞫並交臣等分別辦理除因病身死各名外索諾木

係賊酋首犯其兄莎羅奔岡達克索諾木彭楚克

甲爾瓦沃雜爾主謀助惡其姑阿青自郎卡歿後

一切聽其專主及大兵攻討抗拒肆橫皆其調度

山塔爾薩木坦丹巴沃雜爾庸中旺嘉勒七圖甲

噶爾思甲布阿木魯綽窩斯甲俱係用事大頭人

都甲喇嘛雍中澤旺堪布喇嘛色納木甲木爍助
逆咒詛以上十二犯罪大惡極均經凌遲處死索
諾木之母阿倉頭人尼瑪噶喇克巴阿布頗魯格
什納木喀爾結達什色格桑達爾什納木甲達爾
什桑卡爾喀什巴拉木布籠普占巴雅瑪朋阿庫
魯達什溫布策旺沙巴租普阿布穆木里撒思丹
札布僧格格布爾章阿杉車斯局斯達拉等或黨
惡與謀或領兵抗拒又斯丹巴係首逆索諾木之

第七圖阿申係逆犯七圖安堵爾之子阿咱納係
逆酋蒙固阿什咱阿拉之子以上十九犯均經處
斬此外番犯及家屬等永遠監禁者十六名發往
伊犁給厄魯特為奴者五十二名索倫兵丁為奴
者四十五名三姓為奴者三十四名賞功臣之家
為奴者五十八名跟役班第喇嘛發往江寧喇嘛
寺安插役使者十五名通計渠魁首惡以及逆黨
餘孽或寘之重典或貸以餘生悉準其情罪之重

輟以播

天威而彰

聖德茲當獻俘事竣應將先後遵

旨分別辦理緣由通行各該衙門宣示中外奏入報

聞

乙亥

上諭內閣曰吏部郎中王昶在軍營出力年久頗著勤勞著加恩陞授鴻臚寺卿並賞戴花翎仍在軍機處

行走

丁丑刑部奏言已革叅贊富德扣罰土兵鹽菜銀
兩彌補賞湏一案先經奉

旨派臣袁守侗往川會同將軍阿桂總督文綬審訊嗣
因富德呈出密封清字奏單奉

旨將富德及已革總兵英泰解京審辦又因富德家人
趙清騷擾驛站奉

旨將管解不嚴之員外郎開泰革職一併解京歸案辦

旨將富德等公同嚴鞠取具各犯供詞茲復仰蒙

廷訊富德俯首認罪無可置喙查富德於賞頒項下扣
得元寶六個入己又收受保舉知府曾承謨餽金
五十兩又任性叅革副將廣著不候

明旨即令充當兵丁致廣著自戕身死以上各款業已
罪有應得至密封清字奏單所稱阿桂手持黃鉞
口發狂言一節據供因被嚴叅自知必死心懷憤

恨是以密砌款蹟希圖陷害洩忿等語富德以屢
獲重罪之人蒙

恩復加擢用並不奮勉立功猥鄙貪詐至將狂悖大逆
之詞寫列奏單上達

御座以律應寸磔之罪有心誣陷應照誣告大逆律擬
斬請

旨即行正法英泰於富德尅扣兵糧通同舞弊應發往
伊犁充當苦差開泰係富德保舉陞用於叅奏廣

著狗聲附和及押解富德時並不嚴加管束一任
伊家人前站騷擾迨恐彰著難掩始以一稟塞責
實屬狡詐不堪應發往烏魯木齊當差候補知府
曾承謨因富德之母生辰餽送金兩殊屬不合應
請交部嚴加議處奏入

上諭曰富德著即處斬英泰開泰曾承謨均如所議行
丙申明亮舒常文綬桂林奏言臣等查通藏大路
如碩板多石板溝巴塘裏塘等處均係番人出入

要隘現擬飭派守備李天福駐裏塘都司福成駐
巴塘都司李景善駐碩版多外擬將江卡汎把總
移駐石板溝添派守備鄭元文駐守則石板溝既
有專汎該守備可就近督察再查裡塘通藏站路
東西長四百八十里南界滇夷北通瞻對諸番防
範匪易應請添復土馬兵一百名以資巡哨追捕
之用其土步兵七十名毋庸復添以節糜費奏入
上命軍機大臣議奏旋經大學士舒赫德等議言應如

所奏辦理

上從之

六月丙午明亮舒常文綬桂林奏言竊兩金川地方設鎮安營自桃關至明郭宗共十九站中間瓦寺鄂克什番地袤延六百里並無應辦屯種之事若槩於留駐屯防兵內按塘安汛不特兵力多分亦覺鞭長莫及臣等公同商酌自桃關出口至巴朗拉計十四塘每塘各安綠營兵五名俱于內地

存營額兵內酌撥安設並於適中之卧龍關酌派
千總一員帶兵十名前往駐扎其巴朗拉以外自
松林口至鄂克什官寨共五站俱於小金川屯防
兵內撥設仍歸美諾新營管轄則內外塘汛各有
責成而管理均屬近便奏入報

聞

丁未明亮文綬舒常桂林奏言查各營舊制火藥
一項原有預備五年之例今兩金川留駐兵屯計

共六千五百名即將美諾等處現存火藥十二萬餘斤撥令備貯以充五年內操防已屬有盈無絀至大板昭藥局亦存九萬餘斤並火彈內所包淨藥合計共十二萬餘斤臣等訊據各鎮將僉稱火藥五年後類多發變但攪和以新鮮硝磺仍可搭配應用等語茲除美諾等處舊存火藥業已分散各營備用外所有大板昭局內餘存火藥暨鉛丸等現已派撥弁兵好為收貯如有年久變壞即可

覆加硝磺搭配散給以資操防奏入

上諭軍機大臣曰火葯運送口内核其腳價比內地製造為費較多自應即存原處備用但火葯存貯日久尚恐霉變鉛丸則雖歷年久遠其質不致損壞而每年揀演鉛丸非所常用存積更多著傳諭明亮等即飭各將弁將所有鉛丸收貯妥密之地毋致稍有疎失其大板昭多餘火葯並一體嚴密收貯以備將來攙合製造之用

同日明亮舒常桂林又奏言臣等查各路官兵居住之平房碉座均上緊砌造約計五月內即可完竣已飭將餘丁口糧等項扣截至五月止全行裁撤以節多糜至所需木石皆係就地砍運該兵丁等自行成造并無開銷物料工匠之項再查新疆既設鎮將等官駐劄彈壓自應建立衙署第鎮將等現各蓋有平房或五間或三間足資棲止辦公若將衙署照內地一律辦理不惟山頭地勢成造

維艱且亦未免多費容俟酌量情形從容籌辦至
設汎開屯兵番等錯壤而居實于編管屯耕之中
隱寓相制相維之道無患其稍滋事端且查降番
等現將殘燬碉寨自行補砌盡力墾耕察其情狀
各圖自保身家安土樂業現在秋蕎等項早經樹
藝而散給內地瓜蔬等種復皆青葱播野氣象甚
覺安舒此後只須遵照現定規模休養生息自可
永見牧寧而屯政日收成效奏入

上嘉之

平定兩金川方畧卷一百三十五

欽定四庫全書

平定兩金川方畧卷一百三十六

七月丁丑

上諭內閣曰此次平定金川所有各省綠營調往馬步
兵丁借支行裝銀兩應于回營後扣餉還項因伊等
効力行間業於恩詔內展限三年分扣今復念該兵
等應扣之項較多若於三年扣完恐月餉所存無幾
不足以資養贍著再加恩照從前平定伊犁回部之

例分作十年坐扣以示體恤

九月辛未明亮文綬舒常桂林奏言查番地籽種
菽以夏種麥以春種皆須預為籌備先經飭委營
員於附近各土司地方採辦止獲菽籽四十餘石
不敷散給當飭茂州保縣於存倉菽籽內動撥五
百石已解往噶拉依底木達等處及時播種其麥
子於內地採辦一千石解赴美諾勒烏圍等處至
牛隻一項番地旌牛不能耕地惟犏牛可用先經

委員採買僅得五百餘頭隨飭於松潘所屬各番地及三雜谷裡塘巴塘等處採買犏牛一千五百頭並飭內地附近各屬採買黃牛四百頭現已陸續解往可以無悞春耕其各項農具軍營存貯生鐵甚多熟鐵頗少除鋸齒鐮刀一萬八千把於內地製解外其餘生熟鐵具先已僱解鐵匠十名赴屯開爐打造再查小金川納木覺爾宗一帶稱有出產土鹽其味甚苦內地兵夫皆不能食若由內

地辦運腳價甚重臣等現在籌酌擬令兵丁凡遇辦送衣履換班出差等便俱准其裹帶搭送鹽斤可以源源換濟其土鹽仍聽番人自行煎食毋庸官為經理奏入報

聞

十月乙丑明亮舒常文綬桂林奏言竊兩金川設鎮開屯前將兵丁議以三年換班原係酌中定期惟屯防兵丁原應將隨征未久之兵留駐其隨征

年久應即撤回以示體恤但今春辦理之初屯務
創始因就征兵內擇有壯健得用挑留口外而征
兵舊調者多新調者少是以現在留屯之兵多係
年久出征今若將留屯兵六千名一體換班則盡
係新調不免人地生疎臣等悉心籌酌請將屯防
兵分作三班更換自四十一年冬季起每年派換
二千名按其出征年月久近以次更替一周以後
仍照三年定期更換奏入

上諭軍機大臣曰明亮奏請將兩金川屯防兵六千分作三班更換所辦尚未允協兩金川屯政初開必得勤安兵丁留駐墾耕以期久遠之利川省綠營兵衆疲玩者多若令分班更換安得如許有勇之兵選派前往況屯墾貴乎熟習地利設伊等知有及瓜之代惟盼如期換回且以所種之地並非恒產誰肯安心盡力徒令僕僕往來仍無實濟莫若令屯駐之兵挈眷前往使各有室家可戀自皆安居樂業盡力耕作

以期贍給方於屯政有裨即搬眷應籌資助亦不過此一時酌辦較之每年換班繁費其省便相去何如或其中有不願攜家者諒亦無多不妨及此初辦之時於內地另選精壯兵丁攜眷往代庶乎一勞永逸可為經久良圖將此傳諭知之

臣等謹按番戍為權宜之計屯防為久遠之謨惟人有固心斯事期經久明亮等請將屯防兵六千分作三班更換蓋惟知軍丁挈眷給資籌

費而不計僕僕往來視如傳舍究無實濟且更番替代其繁費不啻倍于挈眷也我

皇上灼見機先洞中情隱以屯墾之要貴乎熟習地利俾屯兵得挈家前往盡力於所種之地安心樂業永固邊陲洵

體恤之深仁亦不易之良法也

同日明亮舒常文綬桂林又奏言查四川將軍駐扎省城現在統轄松潘建昌綠營及兩金川駐扎

官弁實有地方之責一切文案現無承辦專員臣
等擬於綠營官兵內酌量調撥設立將軍標中軍
副將一員都司一員守備一員承辦綠營事務以
專責成前議將提標後營留駐省城歸入督標今
擬即將後營改為軍標並將永寧協副將調補軍
標副將以永寧左營都司移駐龍安營其永寧協
改為永寧營以龍安叅將守備移駐至提標後營
額兵僅四百餘名為數太少永寧協原額兵八百

餘名應酌撥二百名歸入軍標以供操防差遣如此一轉移間官兵不煩添設而將軍衙門既有本標將弁即有應設書識足資辦公遇出巡之日亦差委有人似於營務番情均有裨益奏入

上勅軍機大臣會同該部議奏旋經軍機大臣會同兵部議覆請均如所奏辦理

上從之

十二月丁巳成都將軍明亮率入

觀之明正宣慰司甲爾叅得沁木坪宣慰司甲爾叅納木
瓦寺安撫司桑朗遇春霍爾章谷安撫司汪爾甲
策爾丹綽窩安撫司朋楚克拉布丹孔撒安撫司
策丹納木扎爾巴塘宣撫司袞布甲木沁裡塘宣撫
司丹津袞布下孟董寨土遊擊穆塔爾雜谷腦土
守備阿旺帛噶爾角克碉土守備二等侍衛穆塔
爾別斯滿土守備阿忠保管理金川河西暫充土
守備丹比西拉布管理金川河東暫充土守備達

固拉得爾瓦鄂克什土舍斯丹怎甲木錯綽斯甲
布土舍綽爾甲木燦梭磨土舍阿拉從噶克土舍
彰布木綽窩土舍色納木達爾結鄂克什大頭人
賴興革布什咱大頭人達爾結巴旺大頭人雍中
太布拉克底大頭人雍中爾結丹壩大頭人策旺
稱拉卓克采大頭人阿結麻書大頭人登珠頭人
諾爾結德爾格忒頭人色楞拉布坦策旺邦暨番
衆通事二百餘人至京

戊午明亮率甲爾叅得沁等二十九人叩仰

天顏

賜甲爾叅得沁等膳於瀛臺

賜袞布甲木沁孔雀翎自是甲爾叅得沁等輒蒙

召見

賞賚緞匹荷包器具食物殆無虛日

己未

上諭內閣曰四川邊外各土司於此次征勦兩金川或

多派土兵協同攻勦或撥烏拉餽運軍糧均屬奮勉出力現在趨赴關廷共抒瞻就之誠尤為可嘉著加恩賞戴二品紅頂並令其子孫承襲後一體戴用其隨來之土舍頭人等向有越級戴用帽頂者亦著加恩仍舊賞戴以示優獎是日

賜甲爾叅得沁等二十九人朝帽帽頂朝珠蟒袍補褂

庚申

賜侍衛穆塔爾默克贊巴圖魯魯號與前給巴圖魯號之

阿忠保雍中爾結各賞銀一百兩

丁卯

上御保和殿筵宴甲爾叅得沁等皆與宴

四十二年正月戊辰

上詣

聖母皇太后宮行慶賀禮甲爾叅得沁等皆隨行禮

上詣太和殿甲爾叅得沁等行慶賀禮

癸酉

上御紫光閣筵宴甲爾叅得沁等皆與宴

丙子

上御閱武樓閱兵甲爾叅得沁等皆從

丁丑

賜甲爾叅得沁等宴於

山高水長幄次自是屢蒙

召至幄次令觀火戲

壬午

上御正大光明殿筵宴甲爾叅得沁等皆與宴是夕

上御山高水長幄次甲爾叅得沁等及番衆五十三人以

次歌舞復

賜緞匹有差

辛卯甲爾叅得沁等暨番衆通事起程四川

上命派官護送

臣等謹按蜀中諸土司仰蒙

天討所加剪除稂莠各予安全

聖慈淪浹已邀格外茲復

命隨班入

覲得慰就瞻

恩賚便蕃露渥均渥復

遣官以護其歸路柔遠綏遐無微不至是以諸土司輸

忱嚮化倍切傾葵而井絡以外胥蹈詠於

德威之並濟也

八月辛丑

上諭內閣曰昨歲大功告成兩金川境內名山大川効
靈助順者曾降旨令明亮查奏今據奏金川之索烏
甲索二山及小金川之墨爾多山並著靈應又金川
大河當官兵進攻勒烏圍時立柵沿河堅持數日立
值陰雨連綿河水旋長旋消及攻得勒烏圍官兵移
柵後即盛漲漫溢河神効順實贊成功均宜春秋秩
祀以彰報功之義著載入祀典用垂久遠

十二月癸丑明亮文綬桂林奏言川省提督前經

奏准移駐雅州雅州離省三百餘里距西路較遠
提督為統轄番夷大員遇有邊要機宜與將軍總
督必須隨時面議番民有事來省亦須公同商辦
應請照舊駐劄省城毋庸移駐奏入

上命軍機大臣核議旋經議言將軍等體察情形以提
督移駐雅州轉多未便應如所請毋庸辦理
上從之

四十三年二月壬子

上諭內閣曰兩廣總督員缺著桂林補授特成額著補授成都將軍四川提督員缺著明亮補授

九月己酉特成額文綬明亮奏言兩金川現共駐兵六千名雜谷屯練五百名鎮將備弁一百七十七員維時夷疆初定農事甫興兵力自難減少今歷時漸久番夷傾心向化彈壓無事多兵請將屯防綠營兵六千名量其地勢之險易田土之廣狹抽減二千名留四千名以二千名屯田二千名差

防並於原派差防屯練五百名內撥出二百名給地耕種俟其生計就緒亦照屯戶辦理至兩金川以美諾為適中扼要之地現駐總兵一員足資統轄阿爾古總兵擬改副將亦歸美諾總兵兼轄其餘將弁以次酌減擬裁撤百餘員於營伍屯務均敷經理本年各屯收穫新糧較上年已有加增除留給籽種外即可搭放口糧所有漢屯各兵均自七月初一日為始按日支米八合三勺即將新收

屯糧酌量搭放奏入

上命軍機大臣會同兵部核議旋經議言美諾駐總兵
一員遊擊一員都司一員守備一員千總把總外
委一員兵八百名僧格宗駐守備一員把總外委
三員兵三百名翁古爾壘駐千總一員外委二員
兵二百名約咱駐把總一員外委一員兵一百五
十名章谷駐千總一員兵五十名底木達駐都司
一員千總把總外委三員兵三百名大板昭駐守

備一員把總外委二員兵二百名阿爾古駐副將
一員都司一員千總把總外委六員兵六百名獨
松駐守備一員把總一員兵一百五十名噶拉依
駐遊擊一員千總把總外委三員兵三百名喀爾
薩爾駐守備一員外委一員兵一百五十名茹寨
駐叅將一員千總把總外委三員兵二百五十名
噶爾丹寺駐千總一員把總一員兵二百名馬爾
邦駐守備一員千總把總外委三員兵二百三十

名曾達駐千總一員外委一員兵一百二十名計
共留鎮將備弁等六十員兵四千名至差防屯練
內撥出二百名亦應如所奏撥給屯種俟有成效
報部核辦漢屯各兵口糧均照每日支米八合三
勺之例即以新糧搭放仍令將軍等將收穫糧石
留給籽種搭放口糧各數咨報戶部查核
上從之

四十四年四月辛巳持成額文綬明亮奏言自哲

爾覺至勒烏圍十一塘半每塘原設塘馬四匹今
阿爾古總兵改設副將金川屯務統歸美諾總兵
辦理阿爾古文報較前減少且噶爾拉一帶雪
山馬匹難於馳驟應請改用步塘遞送原設塘馬
四十八匹全行裁撤每塘添設塘兵二名共二十
三名即於美諾阿爾古汛兵內酌撥奏入

上命軍機大臣核議旋經議言哲爾覺等十一塘半應
如所奏改設步塘所裁塘馬及草乾等項銀兩均

歸節省項下報部

上從之

八月壬申特成額文綬明亮奏言屯防經費自乾隆四十一年起至四十三年冬底止如辦運糧種採買牛隻製解農具撥運存屯米糧修建倉廩碓房以及丈量地畝官役公費攜眷兵民屯戶路費等款計支銀十萬五千餘兩均以設屯經始非關年例至歲需定額如原設綠營屯練六千五百名

應需鹽菜銀七萬餘兩加以各營官弁鹽菜文職
官役月費工食官兵換班行裝俸餉西南兩路塘
汛弁兵鹽菜並塘馬草乾以及買補牛馬修整農
具解運糧餉等款俱照奏咨定例支給每歲需銀
十萬餘兩計三年內實支銀四十一萬五千餘兩
嗣經_臣等奏撤屯防官兵二千三百餘員名計歲
需已減十分之三所有四十四年經費約需銀六
萬五千餘兩新疆設鎮安營原以永靖邊圉仍須

因時度勢次第調劑擬於今冬再撤兵一千餘名
應俟臣特成額於巡查各屯時詳察情形熟籌辦
理奏入

上諭軍機大臣曰據特成額等奏兩金川新疆屯防經
費歷年支銀四十一萬五千餘兩自應照奏定章程
報部核銷至所稱裁減官兵以後尚需經費銀六萬
餘兩年復一年長此安窮實為非計前此平定準噶
爾籌理屯防事宜將陝甘腹地各營兵額漸次裁減

於供支經費外尚有盈餘所辦最為妥善邊省多設
弁兵原以捍禦番夷兩金川既經蕩平設鎮興屯足
資控制自當於川省腹地各營酌裁兵數以抵新疆
經費但現兵未便遽裁止須遇缺停補如此不動聲
色以漸經理方為兩全之道著傳諭特成額等通盤
籌畫詳晰妥議迅速覆奏

同日特成額又奏言新疆各屯土性氣候不齊高
阜向陽之地稞麥俱已黃熟其地處低窪及向陰

積雪者亦漸次結實大勢較上年為稍豐約於八
月中旬均可陸續收割臣巡查各屯於八月初六
日起程即由桃關出口前往奏入報

聞

九月庚戌特成額文綬明亮奏言欽奉

諭旨酌裁川省腹地兵額以抵新疆屯防經費已通飭
各標鎮協營遇有名糧缺出遵

旨停補

臣

等前奏新疆經費歲需銀六萬五千餘兩止

就各項銀數而言官兵口糧尚須另為籌畫各屯四十三年及本年收穫新糧約俱一萬餘石以現兵四千及官役等日食計之歲需糧一萬六千餘石目下尚有軍營存米添補供支將來舊儲既罄所獲糧數實不敷軍糈數千石若由內地輓運更為非計現在兩金川地方耕鑿相安各土司遵守法紀實可永期綏靖應請仍照前奏於屯防兵四千名內再撤一千名各兵向係計年換班而其中

原無眷屬單身在屯及業身攜眷長駐屯所者已
有一千六百餘名請照現議三千之數選募單身
及攜眷兵丁陸續抽換足額令其長駐為兵樂業
安居漸如內地歲收新糧亦足供搭放所有長駐
兵三千名擬併為五營計駐總兵一員遊擊二員
都司一員守備四員千把外委四十四員足資管
領至新疆屯務現於美諾駐同知一員阿爾古駐
直隸州一員分管七屯每屯各駐糧務廳一員今

各屯糧務止須酌設五員並將原駐阿爾古知州
裁撤統歸美諾同知管轄奏入

上命軍機大臣速議旋經議言新疆駐守官兵原以鎮
撫番夷令將軍等體察形勢實可裁撤屯兵千名
應如所奏酌裁辦理官署營制亦宜變通裁併其
裁改營屯及扣減馬步餉乾米折養廉公費等項
仍令詳悉妥議咨部核辦

上從之

十一月壬午特成額文綬明亮奏言屯防兵額擬
定為三千名應於小金川地方分設二營美諾一
營駐總兵一員遊擊一員守備一員千把外委十
四員兵八百名僧格宗翁古爾壘約咱等處大小
汎塘即於美諾營內分撥底木達一營駐守備一
員千把外委六員兵六百名大板昭及各塘弁兵
均於底木達營內分撥金川地方分設三營阿爾
古一營駐遊擊一員守備一員千把外委十一員

兵七百名噶爾丹寺獨松等處汎塘均於阿爾古
營內分撥噶拉依一營駐都司一員千把外委七
員兵六百名喀爾薩爾馬爾邦曾達等處汎塘均
於噶拉依營內分撥茹寨一營駐守備一員千把
外委六員兵三百名金川三營均屬阿爾古遊擊
管領仍與小金川二營並歸美諾總兵統轄各將
弁果能奮勉出力請照管屯文員之例三年期滿
以應陞之缺奏請陞用其應設遊擊二員擬將泰

寧敘馬二營遊擊裁改泰寧營改設都司以建昌
鎮屬永定營都司改補即將泰寧營守備改為永
定營守備敘馬營亦改設都司以維州協右營都
司改補即將敘馬營守備改為維州協右營守備
應設新疆都司一員以建昌嘉順營都司裁改守
備四員以四鎮右營都司所管中軍守備四缺裁
改其改駐新疆遊都守各員並請改為題調之缺
千把外委四十四員應於內地各營酌裁移設咨

部核辦各官養廉並應扣公費均於三千兵額內
照例辦理其內地各本營原扣養廉公費名糧一
併裁充新疆經費現議移駐兵三千名亦於內地
各營裁撥松潘一鎮維州阜和二協與將軍標一
營均應減半核裁其餘各標鎮協營一例均勻攤
減即以裁兵之餉移解新疆支放但各營多係馬
一步九間有馬二步三者口外跬步皆山馬匹本
不得力應俱定為馬一步九以為獎拔之階今冬

正屆換班臣等飭令於現駐新疆兵內不拘班次
將情願撤眷及單身願留者儘數令其長駐其應
由內地輪撥之兵亦儘情願攜眷及單身長駐者
撥往如不足數隨時募補抽換移歸新疆兵額雜
谷屯練二百名除八戶情願留屯外其餘概行裁
撤向來防兵原以一半耕種一半差操今令長駐
屯所擬以兵二名種地一分通力合作輪替差操
所獲之糧即令二人自收自食各兵例給口糧明

歲秋收即可停止且地既自耕應將現有牛具撥給聽其自為經理其例給額餉內米折一項請照阜和協兵之例每歲支銀十兩八錢即將鹽菜停止鎮將備弁鹽糧一體停支惟文員官役喇嘛人等約需口糧千石現在倉貯尚屬充裕將來屯練降番所餘地畝廣招民戶屯種足資接濟至七屯糧務併為五屯擬於美諾底木達章谷阿爾古噶拉依照舊各設一員大板昭屯務歸附近之底木

達管理馬爾邦屯務歸附近之噶拉依管理其口
外各塘汎西路自桃關外之大邑坪至巴朗拉十
五塘現以內地附近營兵撥設又自松林口至鄂
克什五塘現於屯防兵內撥設今應將西路各塘
均於松潘鎮維州協所屬營內分撥南路自打箭
爐以外之三道橋至章谷十五塘仍於阜和協兵
內撥設各塘在瓦寺鄂克什明正諸境內無田可
耕應得鹽糧及換班分例並循其舊兩金川境內

各塘兵丁均照新議章程辦理所有新疆經費除防兵三千即以內地額餉移給外每年約需各項經費銀三萬餘兩

臣等遵

旨擬裁內地額兵一千五百名及酌減新疆駐兵馬乾可數抵補奏入

上命原議大臣核議旋經議言新疆屯防兵額既議減一千名應如所奏鎮將備弁五十二員於美諾底木達阿爾古噶拉依茹寨五營分駐防守並隸美

諾總兵統轄該將弁等管理屯田操防如果董勸
有方即照管屯文員之例奏請陞用所有派駐遊
擊等官即於內地簡僻營分裁缺改設自改駐新
疆責任較重准其在外揀選奏請調補其由內地
移駐兵三千名定為馬一步九洵屬因地制宜雜
谷屯練原籍有田地者並准裁撤俾安本業向來
屯兵換班其往來騎馱需給鹽糧不無繁費今改
為長駐諸項俱從節省而屯田各食其力口糧自

可停支牛具籽種亦無庸官為經理其例給米折
一項准照阜和協兵之例支給即將各兵鹽菜及
將弁等鹽糧停止至所奏各屯糧務准其於美諾
底木達章谷阿爾古噶拉依酌留五員並歸美諾
同知管理大板昭馬爾邦糧員與阿爾古知州一
併裁撤西南兩路塘汛亦應准其酌撥除無田可
耕之各塘兵仍給鹽糧及換班分例外其餘均照
新定章程畫一辦理新疆屯防規制既為詳盡而

歲需經費撙節得宜於籌邊裕餉經久之計自有裨益

上從之

臣等謹按兩金川之役

皇上聖謨廣運不惜捐數千萬

帑金以為綏靖蠻疆一勞永逸之計當

王師西指之初即

密諭在事諸臣於平定兩金川後仿照從前辦理雜谷

腦之法設鎮駐兵盡成內地

先幾握算若持左券迨軍旅告歲而善後規模仰蒙
指示迄於時閱三載番民傾心嚮化猶以屯防諸務再

四

疇咨相地勢而定營制順人情而勵農功酌劑咸宜因
時適變綱舉目張條理悉備伏考漢平駱越而
軍吏經瘴疫者什四五至明世土官叛服不常
若播州楊應龍永寧奢崇明水西安邦彥之屬

雖後先勦滅然如朱變元所云築城守渡轉運
煩費則亦率從苟簡非善建不拔之長策也兩
金川地處險遠視播州諸境相去何啻倍蓰始
則犂巢埽穴民不知兵繼以裕餉籌邊事垂可
久良由

睿慮周詳

乙夜批章不遺端末是以諸臣皆得有所稟承多方經
畫俾雪嶺氷梯均為沃土從此西南酋長益効

惓誠共安

至治蓋自準夷回部胥入版圖距茲未及二十年而

鴻勲再集軍屯並修

聖天子之德威政教誠非歷代以來羈縻約束區處權

宜所能髣髴萬一者矣

平定兩金川方畧卷一百三十六